

四明叢書

張宗祥



楊文懿公文集卷第十三

明鄭楊守陳鏡川撰

東觀稿

栖芸先生小傳

先生諱範字九疇鄞仲夏里人長身美髯容觀雋爽雖燕居私室恆盛服端坐人望之若神通易書詩三經博涉羣籍力希濂洛關閩之學德性剛方踐履誠確視世之毀譽榮辱漠如也少生富家長罹患難窮窘至僦屋以居老而望尊貲給子姓榮貴其服食言行一如人不

見其少異焉永樂中有巫稱龍神道人禍福如響家趨
戶迎官不能禁先生作文令人讀以諭之弗止躬往見
巫捽其首痛毆之巫匍匐于地洒然以醒時擁巫羅拜
者數百十人皆驚悟散去邑中右族子弟恆歲從游皆
泣以威嚴誨以禮義多所成就高第薦歷中外者頗眾
里中有競者先生一言折其是非無不恬服郡守令若
鄭公珞張公鐸或禮其廬或賓致以咨政一修地志三
修實錄皆聘先生爲總裁焉初號栖芸學者稱爲栖芸
先生晚年造履彌篤更號思誠叟爲文辭操紙筆立就

皆端重爾雅惟不爲人誌墓卒之歲自爲墓誌有曰少
而慕古壯而學古老而益好古者吾之行也人以爲實
錄有四書直說道統言行集栖芸稿詠物百詩菊花百
詠等數十卷傳于家

送陳先生序

拙庵陳先生自鄉舉高第歷教定州永福寧化今遷秩
於湘陰交游在朝者屬某摛文以爲贈某素愚拙不爲
文矧史事方嚴朝夕役役不暇爲文然以契家之好感
今慨昔有不容已於言者蓋先生與先君子家居密邇

時相往還講習暨游京師交日益厚繼偕試于秋闈而先生與選典教於定於永福書問不以春則以夏未嘗曠也先君子德學高邁仕雖拓落而所交多顯貴俊賢魁壘之士與人雖泛愛博容而心之所契合口之所稱許者無幾若先生則其所稱許而契合者也某方省覲時趨庭之際旣耳熟先生之德美而復時見其手書詞翰兼懿心敬甚慕然宦轍相避踰十數年而始獲撰杖履從後則先君子已不可作而當時故交若夏官亞卿李公茂實翰林檢討陳公紀秋官郎中林公厚者或在

九原之中或處萬里之外已不勝其慨矣至於今則先
君子之交日益零落而先生若靈光之歸然足以樹典
刑於將墜貽誨戒於方來而瞻拜未幾睽違遽促況有
無窮之感其何能已於言耶然先生學豐而材敏篤厚
而清修教雖陶乎士類而功未溥於生民蓋猶騏驥之
足而馳騁於戶庭之間也今當聖主側席良臣推轂之
際行當領一鶚之薦以應三鷗之兆得以大暢厥施則
某於所謂典刑誨戒者亦庶得竟所願乎因書以俟之

送連帥陳侯彥章序

吳粵連帥陳侯彥章秉弓矢節鉞之權服禮義詩書之道良所謂武而文者茲董漕運之役來京師事竣言還朝之摺紳嘗與交好者若納言陳世用柱史魏孔淵十數公皆分題賦詩以餞之而屬余序京師取給於東南之漕舊矣吳粵之連帥以漕事至者無歲無之而摺紳君子莫或贈以文辭蓋其人多武而不文者翠翹珍髥不以與尼玉敦珠槃不以委之氓隸非特此有所恪彼亦安所用之太玄曰斐如邠如虎豹文如夫虎豹至武者也且有自然之文焉古者三苗之征鳴條之戰牧野

之役蓋莫非兩有文武之士周公東征之師雖被堅執
銳者亦莫非聖人之徒也其後文武殊途左右佩劒搢
紳不知兵介冑不知義而天下之患不可以藥代有之
矣方今聖明任御張皇六師北征犬羊南伐螻蟻欲犁
其庭掃其穴一時文武効用之士雲合而輻輳有如侯
者可獨事於漕而已耶六月之賦江漢之頌將有作者
余當序之以傳

胡允恭挽詩序

人道莫親於父子父之昆弟親如父兄弟之子親如子

此天理人情之至也然喪服兄弟之子猶子而父之昆弟則殺於父何居蓋於子則親之而已於父則不徒親而且尊親可以皆篤尊各有所專故喪兄弟之子猶子者篤所親也喪父之昆弟殺於父者專所尊也親親尊尊而禮之道立矣先王之世彝倫宣昭百姓親睦生間居死族葬繫之以姓而弗別綴之以食而弗殊服盡者舉同爨之總屬遠者預四宗之祭雖百世蓋猶親也況親如吾父親如吾子者乎棠棣廢宗法壞人之克篤於親者蓋鮮雖以第五倫之賢而愛衰於兄子以謝太傅

之識而哀廢於期功他尙何望哉胡君允恭今監察御史深之世父也深與其兄澄蚤喪父母允恭撫之不啻己子其兄弟之以長以立以有室家者凡百皆允恭之力深之肄文鄉校卒業太學踰十數寒暑者又皆允恭資給之而其與鄉薦登甲科有聲于臺憲者亦由允恭之教也允恭比卒深痛慕哀號欲以喪父之服喪之不可思發其幽光以炳耀于永世迺求搢紳君子爲之狀爲之銘爲之傳爲之誄爲之挽歌辭總若干篇萃成鉅冊而屬余序余惟允恭之克撫從子深之克念世父是

皆得乎天理人情之正而可以爲薄俗勸也且深試禮
闡時余忝較文之列因獲識之而與聞允恭之行雅矣
故舉其大者書於諸作之首其他行備諸銘與傳者此
不復云

與柯孟時求志喜集序書

僕世家四明之鄞邑在鏡川之陽小江之陰麟鳳洲之
上諺曰楊家隱隱者方言卽洲也宗族繁甚鼎分爲三
有東楊宅西楊宅中楊宅之稱僕家西楊也三宅在宋
元時世以高訾武斷鄉曲獨僕之五世祖新五朝奉讀

書樂善務仁人長者之行故其子姓獨昌高祖輔道曾
祖浩卿自號頤正處士皆紹而振之至先大父柄芸先
生迺大肆儒業學博德尊名震郡國儒生學徒恆滿其
座下若今河南布政章繪禮官副郎章規其一二耳先
父梅讀先生溫厚闊達學古厲行於孝友睦任尤篤鄉
人至今稱歎以爲莫及通易經博覽百氏文辭典雅志
將大有爲於世不幸三舉皆不偶僅得泉州司倉賈志
而歿僕與諸弟少皆師先大父而授易於先父景泰改
元僕忝浙江首薦今成化紀元僕弟守趾又忝浙江首

薦而從弟守隨亦選在前列僕初聞之賦詩志喜僅成
二聯而鄉先達大司寇陸公來賀爲口占足成一律自
京師至於四方凡能詩者無不屬和累數百首萃成巨
軸敢干先生金玉之言弁諸首簡勿拒幸甚

封編脩王先生哀辭

先生諱某字某浙之錢唐人性夷曠簡靜博書工詩代
以醫顯益精其術屢恆滿其戶外肩輿以迎者遠邇相
屬藥之率愈愈之不計其報凡貧人求藥報必反之人
稱其長者以子獻賁封翰林編脩徜徉湖山閒踰數年

以卒壽五十有九獻幼而騰異十七舉於鄉明年擢進士官翰林以文鳴於時余與同舉同年又同官同典教於中禁比先生訃聞弔之相向哭失聲一時朝紳爲作哀挽之詩者甚眾余以五七字不足以泄余之哀勉爲楚聲而繁其辭云

歛人生之寓世兮同江漢之羣漚覽歲月其幾何兮溢埋骨於荒丘彼老釋其皆然兮曰涅槃與尸解徒侈言以謾談兮啓懵昏之疑駭死者不可以復作兮卽長夜之冥冥曾不若草木之零落兮留根莖而載榮繁夫人

之脩姱兮襲異芳於累葉咀羣籍之醇醲兮望洙沂而
欲涉采琅玕與芝蕙兮寄芳馨於塵市引康伯之清風
兮蹈涪公之遐軌一刀圭之分惠兮紛生死而肉骨卻
十漿辭五乘兮杏繽紛其霞蔚燁鳳毛之五色兮吐瑤
華於高岡霈善慶之昌侈兮赫馳封之寵光冠切雲而
佩玉兮羌不改此姱節俯澄江以浣纓兮枕白雲於幽
谷胡天之不憖遺兮遽屬續於中堂因北風以遙訃兮
渙余涕之盈眶古與今若一丘之貉兮爾何歆歔乎此
百草總總其具凋兮固獨悲乎蘭芷覽聖賢之挺生兮

亦竟歸於冥漠亙千古而若存兮惟厥聲之彰灼觀有
脩而仁顯兮松有熹而德光斂余哀以化欣兮慶先生
之不亡

送福建按察使張公騰霄之任序

吾同年張公騰霄世家易之涑水其大父父與公三葉
進士家聲鬱然大父官慶府長史父拜職方主事皆弗
竟其施以卒積功累行待公張以大焉公在景泰中擢
監察御史嘗巡三邊按兩淮屏奸祛弊風聲四揚至今
人能道之天順初有鉅奸者妄邀天功遂挾以自肆誅

遂忠讜獄訟無章鬻爵賣官貂蟬踴貴榮枯由其唇吻
廢興候其指麾道路以目無敢竊議時御史楊公廷獻
倡言其奸未報公遂與同列盡疏其惡言甚切直卽日
與楊公併下獄脅使誣引善類五毒備至終拒不承乃
偕謫戍于廣西之南丹方是時鉅奸勢傾中外凜若太
阿之出匣赫若烈火之燎原孰敢嬰其鋒觸其燄哉有
能不怵不懾冒言以排之非志徇乎國而忘其身者乎
是可謂忠直之臣矣其後鉅奸伏誅徙公爲民旣而皇
上御極徵復御史踰年超拜福建按察使而楊公亦同